



Terenga 4: Hōtaka 1 – Ngā Momo Rerenga

He Mihi

Kei aku kaiurungi, kei aku kaikōue, tauti mai rā ki tēnei terenga hou o tō tātou waka, o Ako. Ki konei tātou whakamahiti ai i te korou kia tere pai ai tō tātou waka ki runga ki te moana o te reo Māori.

Hei Mahi Whakarongo

He hōia nō te reo Māori a Cathy Dewes kua roa e pakanga ana kia whakamanahia te reo Māori i roto i ngā pūnaha mātauranga o Aotearoa. E hia kē nei ngā uri kua poipoia e ia i roto i te kura o Ruamatā kia tū pakari ai rātou i runga i te mōhio he taonga te reo, he mana hoki tō te reo. Anei ngā pātai hei whakautu mā koutou:

- 1) Nōnahea a Cathy i tahuri ai ki te pakanga kia whai mana ai te reo?
- 2) He aha tētehi o ngā mātāpono o te wahine nei?
- 3) He aha ngā tūranga o Cathy i waenganui i te hapori?

He Whakamārama

I tēnei terenga tuawhā o tā tātou kaupapa, kāore e kore kua waia kē koutou ki ngā momo rerenga rerekē o te reo Māori. Ki a au, ko ngā poupu o te whare o te reo Māori, ko ēnei momo rerenga e whai ake nei. Ki te mōhio pai koe ki ngā āhuatanga rerekē me ngā ture e pā ana ki ēnei poupu, ka pakari te tū o tō whare kōrero.

- Reremahi:** He rerenga kōrero e whakatakihia ana ki te tūmahi. Ko tana tāhu, ko te kaimahi.
- Rerehāngū:** He rerenga kōrero e whakatakihia ana ki te tūmahi hāngū. Ko tana tāhu ko te mea e pāngia ana e te mahi.
- Rereāhua:** He rerenga kōrero e whakatakihia ana ki te tūāhua. Ko tana tāhu ko te mea e whakamāramahia ana.
- Rereingoa:** He rerenga kōrero e whakatakihia ana ki te tūingoa. Ko tana tāhu ko te mea e kōrerohia ana.
- Rerewāhi:** He rerenga kōrero e whakatakihia ana ki te tūwāhi. Ko tana tāhu ko te mea kei taua wāhi, i taua wāhi rānei.

Kua tārarotia te tāhu (*subject*) o ngā rerenga e whai ake nei:

- Reremahi:** E whai ana koutou i te huarahi tika.
- Rerehāngū:** Ka inumia e te pēpē te waiū.
- Rereāhua:** Kua ora au i a koutou. / He ātaahua rawa atu tō rātou whare hou.
- Rereingoa:** He pene tēnā kei roto i tō ringa?
- Rerewāhi:** Kei whea tō koutou marae?

Hei Mahi

Tirohia ia rerenga kōrero e whai ake nei. Ko tēhea momo rerenga tēnei?

1. Kua ora taku pāpā i tēnā rongoā.
2. E kitea ana ngā hua o te kōhanga reo i ēnei rā.
3. Kua tae rānei koe ki tāwāhi?
4. Kei runga ake rā te rou mamao.
5. Ko Hoani te tumuaki hou o te kura.

Whakautu:

1. Rereāhua 2. Rerehāngū 3. Reremahi 4. Rerewāhi 5. Rereingoa